

鹿
裘
石
室
集

鹿裘石室集卷第七

宣城梅鼎祚禹金著

文

序

贈李別駕守全州序

上八年夏四月吏部文選郎蔣君言臣故家全州州守臣闕臣得以職事按察郡國績書亡如寧國別駕臣韓最者請以別駕往以上宣主上綏遠之仁下殫臣私篤枌榆之義報可別駕

蓋余郡南海李大夫云大夫受

詔行有日郡

太守鄭公怵怵焉心語于堂諸屬令長咨咨焉
語于其邑縉紳士三老百姓竊竊焉交語于廛
于室于田間其較以縣官仰給東南不啻外府
余郡于東南直當吳會一大縣其土磽瘠不任
力無畝鐘之入賦校旁大府固稍減而歲比凶
見食無半菽大司農水衡方時時告匱督攝之
使四出相望責旦夕于郡中郡別駕治賦計將
取盈于私則不勝殘將取訕于公則不勝慢而

慢之皐又卒不勝殘大夫問民所疾苦而手撫
摩之問歲所常賦劑量而緩亟之使卽無年不
知有轉歿卽無浚民不至有逋課令甲歲漕粟
數千石輸京師則漕帥以其卒來輒奴眎賦長
而舉橐焉其事別駕一人實領之矜則勃谿羣
則恣螫無一可者也大夫躬先節介至誠動人
不吐不茹其趨淮而北也大夫出舍淮上舟師
如期以故漕使者婁上書稱善且聯檄用示獎
異云它部直指以梗楊之獄屬大夫大夫精心

爲讞片言立折其意則務寬文屏深詆不欲盡
人之情大都竟大夫之任間不及門誹不及境
苞苴不及目胥史不及耳此其才亡見難者而
沈幾重發終不欲盡已之才大夫職顓治賦故
術治賦狀爲近詳而太守公語余寧國鎬京在
望登三輔而上之其與要荒爲重倍屣主爵者
顧奪大夫寧國而全州其馭輕之謂何大夫誠
賢晉而在郎丞之列要非異數而勞苦三載于
斯也董得徙一州又遠去其陟明之謂何以不

穀賜履茲土日圖可以佐百姓之急與縉紳士
三老豪傑相周還以庶幾有成夫豈直余一人
之能而二三大夫皆相繼先余行余一人其何
協共之有某不佞伏念太守公而下其中殆盡
若不醒然全州非所稱揚越桂林地乎當漢秉
全盛之執而佗以一尉倔彊其間剖符通使第
令和集毋爲南患害而已明興 聖德廣密翔
洽遙涌其鳥言腥食之衆箐棘瘴癘之方並襲
冠帶而敦詩書與中土埒嘉隆之際左紐島夷

右困猺獠頗嘗厯至尊宵旰之憂幸而徵師轉饒疆事以平然余在京師見兩粵人言兵興事則其端未有不自內始者也彼其俗好淫靡伎巧僭自奉爲費甚侈爲生甚微不足以相當或其地自秦時以謫徙雜處獷悍攬秘罔有常懷元鼎以前其利害略可睹矣又或細民刳弊無世業無與具衣食而有司培克無已度無以應上求因囂然喪其樂生之心者不少也李大

夫往矣大夫溫溫有大度志行修潔日討其德

禮而訓之家喻戶曉則民先廉恥而亡以獷悍
攬秘爭名高興農桑程物力絀奇趨本薄斂弛
禁以居者露積充溢行者千里不持糧則人人
自愛而重犯法其不以喜事暴施務見所長以
快一時之覩聽者往而以李大夫往大夫不以
武健雄鷺往而以好往則定志之說也大夫何
有於全州中土雖重水旱盜賊雖間有之而論
世者以爲澤量人谷量牛馬三農不侵五兵不
試都人士雍容嫺雅與古爲徒則蔑有盛于此

時夫遠近無異土輕重無定衡主爵者繇全州而借大夫寧國也意在斯乎而卽余所經覽東方生以執戟疲馮唐以郎署白首其人非不貴侍中孰與龔黃諸君子出而一郡孝弟力田有行義庶民安于田里天子至下璽書黃金褒寵之而間以經術高等入爲公卿言行而功見不益大愉快乎哉往者余郡徐先生守天官郎遂以大夫相余郡徐先生遷而蔣君守選曹遂以大夫刺其州大夫初司理隣郡習見風謠柔

遠能邇其孰不宜太守公平康正直聲赫奕著
中外若揭白日而行其精神志氣足相感召而
先是丞士師方並需次余卜來者必二三大夫
若也吾屬何患乎無良鄭公負席而謝曰信斯
言也夫豈直余一人之幸縉紳士三老百姓其
式靈之子典載記其勲諸牘爲大夫五馬先焉

贈王使君覲序

上孳孳師古爲治間者議吏以久任而郡居先
則其灋自漢始在漢以太守吏民之本數變易

則下不安民知其將久不可欺罔廼服從其教化遂有居官長子孫卽以爲氏以底于神雀五鳳吏道極盛號稱中興其人若黃次公之于潁川出而列郡入而九卿較然著甚要以歲月需之耳顧有定民于半年之間未下車而弄兵者還爲赤子又何其神速也此其故或亦因俗或亦因時今世誦法孔子彼其論政不廢期月三年及相魯立制節除雕僞別塗正賈爲則四方董三月而已辟諸天道或縮而疾或引而長速

則速久則久咸恒誅嬗惟宜是趨蓋余初守天
官郎得質成天下所上計居頃之備東藩得按
諸大郡輒以此意權衡之固亦相當而郡太守
王公者東人也由大司徒之屬出守余郡余郡
在揚州之域保介山谷厥土塗泥若非齊地大
物豐有絲枲魚鹽之利民多樸魯選悞不任法
非若齊鳴瑟跼蹐椎埋鼓鑄有大國之風其俗
宜莫如寬和比以歲之不易天菑流行租庸有
加財力俱誦其時宜莫如休養王公明察內敏

習文法至郡首示民無訟終訟則凶示民知禮
奸禮則討至于人有小過則推心置腹務與更
始公至自秋七月年穀順成會歲方更定民藉
民間以土田約契者稅在官公與縣大夫眎常
賦猶重者以其稅當之有勞止汔可之思焉于
時四境之內訟清而征緩明分而樂生以校于
中都之治猶之三月而已豈不抑以速名哉其
俗宜寬和因之寬和其時宜休養因之休養道
因則大用宜則通詩曰維桑與梓必恭敬止公

其孔子之鄉人非邪明年癸未春屬上當受
計公先期乘傳以往郡中縉紳先生相與祖公
郊關之外士待詔公車者獲與計偕余觀漢文
時吳公治行爲天下第一史不列其績而賈生
實吳公所薦稱夫惟賢知賢物有類應以人事
君人臣之上伐也然一雒陽年少耳余郡今歲
所薦士數盈十五宣爲首善有八人焉上方
側席而求之何論漢世行且御東朝燕見諸長
吏攷察治行將不得貳王公而况公所爲用寬

和而休養之者具在今日矣惟是

高皇帝湯沐邑守嚴地重何論雒陽且如久任之制爲吾郡借王公下璽書賜黃金如次公故事入爲九卿以是而收有成之功要在異日卽以天道終其說一陽爲復六陽爲乾必以馴致也王公起家爲潁州有良吏聲又次公管所部殆天啓之乎泰岱滄海之雄深孟諸青丘之靚麗粹而爲人文故山東多大儒吏者率以經術取高第公下記屬縣按遺書表文獻大都緣經

術飾吏治其所由來者遠矣余以王公于地靈
有徵益以明經術之效也

贈邑大夫詹公入覲序

蓋詹令公爲宣城之明年而丞羅君自夔州至
抵不佞子舍則亟言所爲三峽者云彼其兩涘
涯渚之間辟立如束江怒如崩秋水時至不辯
牛馬往余對公車反也遡流而上猶之覆杯水
于坳堂其行逡巡而多枳廼于今沿流而下置
舟焉若建瓴若驟轡何以異其順逆之勢異也

不佞唯唯又明年而簿簡君自貴陽至貴陽則
寄徑于江嘗言舟中之指可掬也前者于後者
喁鼓楫如林張席如蓋望濤遠引不終日而屈
三千古有之同舟相濟則胡越兄弟有味哉其
言之乎不佞作而唯唯亡何歲庚辰郡國當上
計天子先期兩君輒介紹不佞而申之言曰
今天子嘉惠元元弊羣吏之治詔太宰舉卓
異燕見東朝修故典計無如宣城令公者二三
子日飲于河而不知其德也子藉在文學言則

夙有當庠令公請承間于吾子不佞長跼唯唯
以不佞觀于令公則管所稱才令乎哉當二載
于斯也治賦則具有參伍吏不得緣爲奸治獄
獄立斷如齒腐環城而堰環學宮而城彬彬禮
文之士誦誼亾窮此其才豈不足多操斤而斲
刃必傷矣令公不暴其長而重於慮下其應務
一本于性情而惟孳孳務得民和夫民猶水也
水流而不盈順之則濟者易爲力民一而不黨
順之則主者易爲功此夔州君置舟之說也而

不佞伏稽令甲百里之君必輔之以庶職董之以顯成紀綱相維而境內理宣巖邑其兵賦刑獄何可勝原令公謂與其羅而致之以坐自敝而無肯見瑕孰與其分曹而聽庶幾乎所取者博而事具舉故嘗推赤心望兩君之腹其程督政經必軌于義而兩君循理無害舉其成而質之令公夫江者公也善濟者有其命善政者有和衷其爲道固然是貴陽君同舟之說也彼其始以術地紀則得民情筴濟川則得治理一物

而二美備焉其斯爲兩君奉令公者矣兩君拊
髀雀躍而前曰言有小可以喻大則子之謂令
公哉然此其一隅耳尚安睹夫令公之全二三
子幸以事事公不啻伯氏令公故油油然晁之
也大都其口鮮所是非而胸少所芥蒂或才有
必操其意必舍或法有必致其仁兼施不抑亦
德禮之君子乎夫其德彌厚其用彌章聚則順
擴則公在易之載物而坤安下而剝皆是物也
卽以此而終子之喻水之積也不厚則其負大

舟也無力非虛語矣不佞螻然立爽然自失者久之蓋不佞聞令公父司訓公者正身明學日討其德禮而訓之令公以錫類爲不匱能愛爲無方傳不云乎岷山導江其源濫觴夫汭流者必窮其源厚道也比漢宣帝時號稱綜核其由良令顯者要以化及童稚馴昆虫而已主上神聖天授方且圖敦大而享綦隆卓異之典宜首被令公其曰先河而後海並有以寵令公之先則又聖王之廣孝爲治也敢以是申祖道

之辭兩君敬謝德令公而必原之所生匪直善
言令公亦善言水矣二三子其望洋而向若者
邪願授簡登之

贈陳令君覲序

是歲畿內不雨 上郊而雩廼于 幄次詔公
卿大臣謹擇守令以佐元元余不佞時在扈從
齟首顙天固卬 上德意至深渥退而且私有
繫云夫以佐元元之急誠莫如守令而令猶親
今所患令不良豈必其不自束修與選悞易與

亦豈必其用武健能勝其任而媮快也乎彼不自束修易與爾是示人瑕也人將攻之而用武健之吏頃蒙上督過逮于理將抹命之不皇孰媮快也惟夫少年文巧者出乎其間其才力足自致而其志念迫于得名或伺上所鄉以左右其手或待豪長者以爲政而于懷中取重輕或飾舟車廚傳以君子之至于斯也吾未嘗不得見抑或徂喜其一二細民而掌玩之卽大奸闌出略不問或蒐剔其前人之微闕而苴補之

以從事獨賢大都寧失法無寧間用事者之心
寧失已無寧損當官之譽若而人者輒得驟遷
去而自余所睹記其驟遷去者間一跌輒不復
振語曰力田不如逢年善仕不如遇合言遇合
之有術也又曰磽磽者缺炎炎者絕言不可久
也余與今邑大夫陳公同起家次當爲令相與
感吏道之日文巧益庠而不勝遇合者之衆也
嘗咨咨慨噫之已余繆入館擇令而陳公以令
余邑行余祖于郊而握陳公手曰君其記長安

邱中所嘗咨咨而慨噫者乎息壤在彼遂酒公
公行未期而政聲籍甚部使者薦尉相望矣邑
子有來長安者余問公政狀其一曰吾何知公
政吾野人知穀糴賤盜賊希少民孝弟力田而
已其一市人也曰吾何知公政吾經邑門有青
草胥史不出庭市不改肆士人雍容諷誦而已
余問諸部使薦尉云何其辭率不能舉也蓋余
受天官牘知之而邑子率不能舉公以謂無近
名者非邪久之公移書余曰管司馬安四至九

卿而史氏目以巧宦令安敢望九卿其惟拙者
之爲政矣余讀之矍然起知公報長安邸中時
語也而曾公且入奏計公之僚丞陳君簿蕭君
尉張君覆移書余邸中屬爲公贈三君具言公
益習法比民卽對簿多搏首稱平邑履畝而稅
有隱田令民自具服定爲籍搢紳先生請寄無
所行而其奴客自檢柙使者按部第續食其張
無所加余意公不欲詘已亦不廢法而以茲薦
尉相望也

皇上覽所奏下天官考覈其行事適相副何嘗
乏提衡之績後神明之聲特異夫彼爲文巧而
迫得之耳而又無缺繇之虞備名實之致公何
以謂拙焉然余初見公簡厚不泄精內凝殆早
服而重積者而乃足知善御衆爲吏敏決也則
所稱翕張予奪攘無臂仍無敵者哉而媿闕公
之淺也余方出在臺得糾察吏治獨幸余邑有
良令丞簿若尉又各奉其職以質成于令可以
佐元元而應上德意深且渥矣

贈廖使君覲序

明年元會爲 上御曆之十三年當天下復上
計寧國守臣蠲吉治行益不佞某司郡法而夔
子廖公來爲郡守郡之屬凡六宣城令陳君涇
張君旌德岳君與不佞同薦藉以次第來其先
期來者則寧周君南陵沈君太平馬君云是時
海內方厭苦法令若束濕使民重足立當官若
捄火揚沸犇命不皇于是破峻削而爲清夷先
教化而緩誅罰庶幾德讓之遺風矣而其究也

奸宄不禁或優游養望甚者因緣以爲利不者以飾寧一之蹟而匿叢脞之名此其于制治又民尚安所賴邪要之吏道固亦相爲嬾敝則承之承敝開變存乎其人廖公嘗語諸屬令教緣俗成政因時立然惟賢者不隨俗而俗化不趣時而市功此名言也郡保介山谷其俗故安稼穡務本業其人樸茂篤至世家則好禮文貧人以自食其力上下相通率號易治迨今而戶口豐大幣物純麗濶達多智影纓而委佩者豈不

斌斌顧聿鄉老更廼咄嗟慨愾有反始之思曷
故也其不佞從公後公卽倉猝未見有遽色疾
言而胥史皆凜凜如負霜雪折節縉紳大夫惟
謹而心請寄者口不忍言兩造在庭不必其深
氏而片言立折自己不冤博士弟子執經問難
日漸親而不自束修不敢進大較公所爲不欲
見淵魚廢恢罔之仁亦不欲長惡莠敗嘉苗之
殖往公又嘗誦黃次公之爲穎川云史言次公
之于穎川歎孳孳用和耳而約之曰霸外寬內

明此其意略可睹矣而以今跡其政若烏攫肉
某亭猪子事多攬秘中人陰伏一何近述也公
仁心爲質以實御虛殆爲勝之比者風雨時節
穀糴常賤盜賊少不瘡期月而底已可則和德
之應至誠之効不爛焉著哉初公爲郎領度支
時方刻覈而公以廉平善財濶陋及出爲郡則
其時弛禁疏節而公勤幹習文法出入戴星郡
自管柔弱褊阨宜博大而俗漸靡貴權上功宜
精敏公故博大以精敏意推行之夫因時立政

不市功以趨時緣俗設教不速化以隨俗其所
與諸屬令者非徒言教蓋躬蹈之矣 上益神
聖深惟民事之艱難申勅臺臣振新吏治太守
非所稱吏民之本庫公行矣登文石之陞必親
見問而考察所行以質其言名實相應且當爲
郡吏民暫借公緹車屏蓋還治宛陵它日徵入
而爲九卿一如次公故事也諸令君將身親覲
之是行也屬辭不佞爲公贈夫贈者增也某司
法小吏抑何所增益公私睹公事太夫人孝就

養無方仲弟子而孤公撫之猶子彼謂孝可作
忠慈可使衆其所繇來者遠矣誠何得而增之
語曰不習爲吏眡已成事某少不習吏遂藉其
已成者爲後事之師且以待異日而公徵也小
吏庚載筆以從

郡太守蕭公考績序

上壬辰春覲典畢修 詔銓部察百司治行卓
異者其列諸藉余郡太守漢陽蕭公實預焉是
時蕭公守郡甫二歲越歲癸巳春余不佞過里

門則蕭公上最之期與行會余因諗與諸大夫
若蕭公治最狀主爵者業衰然而舉之以徹
天聰膺異數臺部使者復牘而載之以奏成勳
胥陟明赫赫纚纚旣昭且備第言公所以致此
者何繇丞張侯之言曰蕭公性勤敏辨色而出
事雱而徒幽而奧渫蒙鄙靡不達牘而庫廩圉
廕靡不防罰二十以上必親臨決學徒百餘曹
執經問難輒旦夕不休鄉有約約有講必以身
帥老更徇韜鐸他若新澤宮植文昌祠梓華虔

城隍之屬神人不雜百廢具舉不抑太彀乎哉
而竊闕於公以神用非以形用常恢而攝常約
而章比之於月陰養魂陽成魄故代日而明著
火生而有光而不用其光果在於用光淵乎微
矣戴侯之言曰倅爲役之日淺自蒞郡而觀于
庭肅如其秋觀于里藹如其春觀於庠右飭如
其矩觀於祿首鬱如其林以觀於守則晏坐堂
皇或齊居一室嘯詠從頌綽有餘地夫舉碁不
定且不勝其耦而况爲政意者公有所爲其天

全其機杜者乎何裒然中桑林之舞若發於矐
而承蜩者之猶掇之也不佞唯唯姑孰司理臨
海戴君者聞之而以書來曰兩大夫言者誠然
興賓數從直指行縣得侍公有所見於公公不
援上亦不陵下不干上亦不掩下無福首無隨
尾無懼難無翔易得失贊毀不入於其心一於
其眎百里飯牛而牛肥罔象索珠而珠獲皆是
物焉不佞私甚茹戴君言而因念都門日郡司
理瑞陽朱侯述蕭公之言之也其言曰內重則

外輕已不足則物有餘近譬足取反身而誠何
減何贏何捨何執顧迷悟何如耳及余奉四說
而莊誦之其一澄神周八極貫千古張侯月與
火之喻是已其一定慮有彼來而我無往有思
維而不矯揉戴侯之引解牛與承蜩是已其一
達觀臨海之所見不入於其心一於其眎者也
其一真悟卽瑞陽頃告余都門者諸大夫信善
言蕭公夫亦有所受之公邪公所自爲言進於
道矣何有於徒治且輕天下細萬物何有於一

郡之功昔魯若齊封三年而報政其升降彊弱
在數十世後者姬公以燭照而數計之余安足
知蕭公異日公徵而薦都卿輔贊主德弘王
化太龢宇宙若成周異世者上而野鹿標枝
渾渾噩噩俾我明邁隆三五而吾郡屬畿甸超
美二南則卜之今日公之尊大人由造士佐泰
州而敦史於鄉今且開七秩口不失言進止不
失尺寸步不必杖食不必祝長公方日侍講筵
師保其選安上治民直庭內事吾聞道之真

以治身其緒餘以爲家國尊大人薄收其緒務葆其真蕭公傳之家而致之國維茲郡治猶餘之餘者也卽如登卿輔施弘贊亦其緒而已矣彼四說者其真乎 令甲凡中外滿攷而績最者官其親如子蕭太公殆再命吾知其必傴僂而暨循墻也廼諸大夫請有以贈蕭公聊次其訓對者如此固甚慙蕭公伯仲焉諸大夫惟張侯戴侯在郡中臨海在隣封而瑞陽獻課在都月筴賓望之十一日爲太公覽揆之辰將循古

執爵升歌之式瑞陽尋還郡與諸大夫遞相壽而慶貽封余更於是乎觀禮

贈劉令君考績序

豫章劉公繇庚寅春令余邑也迄是歲月在辰最三載考云蓋疆圉以來江南大浸覆薦曠當事者請上得緩賦什三其七則小民劬劬俯仰之餘以其縣官乃賦長時匿爲尾閭或吏胥夤緣爲奸而賦益積比年四封宴如凡兵食一切費故令悉弛以便民而賦益積劉公至問民

所疾苦莫如賦而又有穴其間也大司農方告
匱其初緩什三者令亟徵公召諸曹湧除其故
與更始各出所伏匿爲約期不如期者罰無赦
頃海茵叵測督府日下檄規調兵食然時實不
給也劉公以意推行之而下不擾賦亦漸積焉
畿輔巖邑以百數宣固樸茂取醇謹耳近稍有
文采槩見彼支弁褻博之士陽高負恃而陰張
其寵靈多造請殉則骹法亢則涕情骹法則失
已涕情則失人無一可者矣劉公不惟其人惟

其志如縣衡以低昂無所主名而埏埴自手出
無所假器進而驩然者曰公煦我嫗我退而蟄
然交戒曰二三子盍自束修以無恩廼公爲卒
之人已兩獲情法鈞適比黨亂羣一時清廓則
劉公以焉余謬持銓久鄉人數數來術劉公治
行更僕未終余謂我 明定鼎燕冀馮東南猶
外府賦入本浚民以生而國之大命以爲營衛
士風以陶冶世俗而爲國脉所綱維夫政尚體
要道貴時宜孰有要於此者乎其効一則甚峻

而著民樂其來蘇而易於見德一則若甚緩而
微士懾其初邁而願與厥成余私已藉之且惟
裁賦濶陜與來蘇見德之効可月計而有餘俾
境內支弁褒博之儔默回鄉而革慮卽歲計而
不足今三載劉公之政成矣臺省者爭薦公於
朝留治邑特牘公治行以逞屆期丞鄖子任君
尉螺川朱君介余一言爲公申僚貳之誼余輒
舉昔所私藉者報之二君意猶嗷嗷也曰司勳
誠賢者識其大耳吾儕循職事日侍公當公來

而邑薦璞芟舍徒禱北昭亭南響潭宵質幽朝
質明雨淋浪霖霖立應也遂以有秋會郡中新
澤宮祠梓華堰黃泥之役程力繕材悉倚辦劉
公百廢具舉宜雖非囂訟兩造紛如公虛衿而
受以去壅緣督而經以去泰無束矢之入察淵
之求士大夫歲時相徵問而已卽土之毛不登
於庭實一魚半菜不易諸市廛而又不必柴車
菅屨以翹衆而矯廉大氏劉公外恢朗中沈毅
鬼焉負公輔之器余聞之按先所載牘亦旣纒

繩備矣顧何如有味乎二君之言因以見向若之觀洞於屬垣之耳不信于友未有能獲乎上者也劉公之前名宣良令者有督學御史詹公又前而有少司寇吳公歸並以内召行實劉公之鄉人也豫章與余邑皆楚地往返挾日風尚形勝邇在郊坰余益信任人者之猶任土爾高而黍稌下而稻麥丘陵坂險而棗栗藪澤而蒲蠡周九州別五地而眎其宜則宣城誠宜豫章矣往余予告過里門睹於公所遇寮若佐者殆

不啻手足而肺附之要以務急公而兼卹其私
非以樹恩今二君言者務虔公而不及私非以
歸惠良有足多焉劉公尋入而交戟之內駸駸
爲骨鯁股肱之臣而無忘任土之喻也必無忘
吾宣不佞敬書以告二君且執契以胥後命

贈郡太守廖公擢溫處兵備憲使序

浙以東諸郡寧紹溫台多負海而寧紹特鄞饒
藻麗溫台之龍湫雁蕩瓊臺石梁名勝甲寓內
金衢括蒼多負山而處特要害嘉靖間海酋作

難則溫台先及處有礦民緣以爲奸利烏合糜
集操挺而呼以故浙按察諸道或以其海任或
以其山任溫處則兼任且閩粵之交也眎諸道
爲猶重云己丑冬溫處闕治兵使者 詔就余
郡拜太守西蜀廖公爲今官廖公居余郡五歲
歲潦者一嘆者二公合筴各令長斥庾粟數千
石子貧民又復懸賞格以勸助于大姓以盡發
其益藏使富者不得蹄財饑者不終轉溝壑已
責省刑躬儉約寬徭賦日衽席其民而嫗煦之

至他則大者斧斷小者刃解殆不崇朝也然余
小子竊睹公憫然志若有所不竟達而材有所
不自見睢睢于于意念深矣彼按察之于守異
職長民之于兵異具溫處之于余郡異地今天
下吏治苦日棘而兵日恬娛以頓也實異時卽
海汛之役幸而息肩曠徒亦守封惟謹耳利者
民所與共命者也儻魑結羣醜乘間抵卻而生
野心乎故曰兵者可百年而不試不可一日而
不備也廖公爲守時業嘗攝六郡兵雖科條不

易而精采一新旁大府至不敢鈞敵焉茲果奉
璽書秉節鉞制浙一方矣夫不輕達其志者其
志必達不自見其材者必能見其材者也以之
治郡則用和而物歸以情以之治兵則用肅而
師出以律各劑于地之所宜而以時舉其職方
軫園轂其具在我何所不可哉雖然余聞之兵
志有國家者必先教百姓而親萬民頃年旱魃
薦臻兩浙有若甌脫公所爲衽席其民而嫗煦
之者等余郡是先親與教之指也余小子無似

爲秀才辱公召置門下賓禮有加因念 明興
而翊運開天有劉誠意胡縉雲葉河南章中丞
世宗朝股肱心膂之寄有張文忠其人皆溫處
產世固未嘗乏賢也昔稱善將將而綜之知人
善任使公其以善遇余小子者稍推廣之當不
如余小子閔嘿一無報効而已往從游公之鄉
達張大司馬今蹇司徒並繇兵使者起司徒初
守河東郡廖公行矣公行而抵浙前蜀督學郭
相奎先生者方叅藩其文章妙天下余邑徐開

府數言征西南夷郭先生帷幄謀居多則非獨
工文故嫺于兵者也計有更端于廖公廖公其
德于余郡甚著搢紳大夫士類能詳不必余小
子去後而有遺思焉豐碑鉅記願請于郭先生
也

郡太守廖公擢溫處兵備序

蜀國廖公守余郡之旣五年而政成乃遷爲治
兵使者填溫處行且有日郡三老薦紳先生咸
怵怵營營焉不忍釋也曰更復有哺我如廖公

者乎蓋天災流行頻歲薦饑則廖公嘗爲發賑
矣藉令四方有警又能恃廖公哉謂以饑故而
弄兵自舒城始楚豫諸國罔不有戎郡中安堵
者以廖公在耳夫獄訟者禁至孰與祛其褻心
而大畏民志耶當廖公爲政宴坐堂皇初不任
法而人人讐服屏息卽功曹吏油然不忍欺也
非德禮之効曷能至此且夫士子之志淫矣窀
言是工奇服是襲遷延文靡蕩而莫稽語曰原
轍存輿無禮必及廖公方則振之程督于經律

度而以功量化調而以情性郡中爲之改肄乃
今廖公可遽去乎莫非王臣莫非王事 天子
卽欲爲海上得人畿輔何後昔嚴詡辭潁川慮
及代者廖公旣以寬和徵得無慮代焉將扶服
闕下請以加服賜金治故郡舊章所有也相與
謀咨未決而質之不佞某某嘗從事主爵知其
事始難與浙人爭廖公也夫亦聞溫處之要害
乎故甌越魑結文身之鄉而瀕于海則島夷出
沒之地也其翳之以山則能爲盜發礦者也嘉

靖中海上多事而温州實爲之主藏以廖公其
才寬而有節亂而能整東南之事非廖公不可
天子豈不以阻饑之衆亂隙易生以廖公往潛
消其孽端而陰按其節制胡不足爲畿甸蔽翼
哉而必以余郡淹也代廖公者漢陽蕭公俱爲
司農郎余嘗與同舍深沈有重度而其意歸於
博大長者始猶之廖公規而隨之清淨寧一其
効可睹矣又何穎川之慮代乎余不佞及族父
兄子弟在廖公部內公行矣又何以侑廖公廖

公蜀人也李冰爲蜀守支江流而渚之田民賴其澤丁亥之滂而公所爲澤于民者有所受之耶大禹生于石紐公之鄉先正也公固在越廖公其纂禹舊服耳令山海効靈有重譯至者在今日矣永嘉括蒼去余郡頗近余將與蕭公日望公之休采而公爲故郡士民念亦必幸蕭公之遵我顙若畫一也

贈太常卿張公遷御史中丞撫閩序

當余不佞入銓曹則張公爲郎主選矣凡天下

吏差次其功能而斟酌其事之繁簡地之險易
廣陋與用之鉅細齡之頽壯並悉出張公手而
公旋應之無遽色旣竣事無罷色余私計張公
固彊幹有力人邪及稍與周還久則張公其爲
度徐而不盈虛而不屈其動而愈出爲而不居
者乎始有道者也張公楚產始楚柄臣足張楚
而公爲兵曹郎委蛇自如也諸郎中若不知張
公楚人頃之柄臣見法而舊狎暱有義故者咸
鳥獸散或繆以吾嘗忤其人而翼爲名高張公

長厚不振暴其短而衆顧知有張公者蓋張公夙擅名理雖亦宦游乎脩然有林下之風江陵憑江多好竹如所稱琅玕者萬个張公爲引渠畝地園其上而名之萬玉卿大夫士相與詠歌之公歸每尚芊吟嘯樂而忘世也人擬之山吏部云余聞之忘天下者廼可托于天下要之以其度勝焉古管大臣出而填撫入而樞筦則郭子儀裴度范文正與韓魏公之四人者皆席殊常之寵寄羣黨之間燁忠畢慮不動聲色不失

進止卒以奏鴻功而永終譽豈獨其才勝哉蓋亦以其度也張公由主選出歷太常上念公參選時持大體無滯才而意猶在扶忠諫振淹廢也且回翔卿寺久進張公御史中丞撫閩矣閩故揚越之區也其地狹多咀自漢已然大海際天點蒼浮碧白沙梅嶺與南粵趾相錯固樓船將軍所欲引兵而擊者也至明弦誦冠帶甲天下然俗悍易反覆或猶有漢之遺而瀕海之民又善出沒諸島國今西北絳虜南事緬所

幸閩海不波爾蓋嘉靖之季閩苦倭者幾二十
餘年而中丞臺事權益重夫用兵猶用人也用
人者方圓曲直良楮短長各因其材而無棄物
用兵者彊弱多寡虛實遠近各因其勢而無敗
機張公善用人也何有於兵且以張公之大
度聞望著中外輕裘緩帶雍容都雅亦何事兵
子儀以單騎臨回紇相顧羅拜范韓一出而寒
西人之膽晉公亦一鼓而淮西平然則大臣之
德望器度猶重哉卽淮西之役師老財匱廷議

未堅也晉公獨自請行師張公居嘗感西事與
余言之而擊節壯其爲人然不以張公西而以
閩往無抑以閩恬嬉有日將重寄之乎張公行
同曹諸大夫屬余小子爲之贈余奉命而西
得以次按阨塞察虜形因論閩語娓娓至此然
張公豈復久勞閩將入而樞筦如所稱四公者
矣

鹿裘石室集卷第七

終

鹿裘石室集卷第八

宣城梅鼎祚禹金著

文

序

尹令公考績貤封序

三代而下漢治爲尚古其論士由鄉始孝弟力田有行義往往至於三事而孝廉尤重固以移孝作忠天之經地之義也自徵辟之典不行而世多隱君子有賢而詘于下者然今貤封之令

則漢氏所未有唐宋代有之而止及于王侯將相至內外庶司咸得以績課與國家之大慶典榮施于父母則因忠而作孝不亦于情近而于禮協哉且賢者爲政于家而免于簿書期會磬折請謁之勞安受服于其子之能仕不必辟徵而朝命加焉卽天之所報賢者不必自其身自其子又使必逮及其身其子民因父母我者而得以報我父母之父母我者以自盡其志蓋崇階累寵上之所以惠勞臣歡欣鼓舞下之所以

效孔邇上下訢合而元氣盎若域中矣此盛世之禎符也而余得之吾宣尹令公焉令公爲余

邑三年考政矣臺使者條列諸薦牘以最聞詔封太公龍川先生如其子令官祁夫人初封太孺人我二人者始親覲其子之有政而喜可知也令公之政于宣甚具至牘不勝舉蓋令公才敏穎而識宏深居之以廉簡而行之以勤勵處紛不煩當機卽斷耳目之應接精神之所注泮無一物不在其胸中而遠邇纖鉅必當其指

使疏暱貴賤必有所位置今試舉其凡則自賦
事有紀經而甲乙之科井然不得相溷移自間
謀不行而無情之不得盡胥史橐舌而冰蘖在
庭間矣文教旣彰而薪樵之速化也詳刑有戒
而獄無放紛水旱之爲災乃荒而不害以雩禱
之來臻而賑發之以時皆鑿鑿有成效者也至
所稱要重爲最大利者莫如礦宣實未有礦訛
言驟興雲集鼓鑄令公乘其未堅夜馳至立諭
而散之封其山數千人無敢譁者權稅之中璫

渡江而臨于姑孰令公以畫中梔之使無入境
其分曹于黃池者陽爲之禮貌而潛制其權使
不得苛肆且所省廚傳供張之費已不貲方今
自三輔以際關雒齊晉魯越地脉幾絕而吾宣
獨爾晏如者伊誰之力歟大較令公之于民真
猶父母之於子血脉貫而疴癢通因心爲愛隨
觸則應不知其所以然而然者而民亦渾忘其
所爲德茫乎其所以爲報而茲以課最受上賞我
父母之父母莽焉被鸞鳳之飾賁綸綍之章其

舉手加額歌樂只而獻萬年者畢四境之內亦
有不知其所以然而然者余以爲爲政者羣司
之尉薦可徵于力競而不可以關衆庶之口一
時之恩倖可冀于非分而不可以馱丘民之心
今寓內三年考政而于令甲得封者相接也然
其四境之內頌聲作而歡心溢必未有如我宣
城者所謂聚百順以事親非耶余族繆名甲宣
城而令公之爲施倍優庶姓家黃州齡九十勅
于筆而亢于論私謂某小子吾所睹于令吾宣

或異地或異人僕指未可數何有如尹令公良
者吾宗惟子爲善頌其帥我子弟而趨邑下以
一言爲太公祁太孺人壽乎余小子唯唯往先
太中嘗守越述祁方伯之令望太夫人則其姪
也比夏旱令公徒步露禱不卹其躬而太夫人
且以蘊隆爲減膳衿襦之勅幅畫之訓夫有所
受之矣越之鄉文勝多智而太公特好儉醇長
者卽就養宦邸不二味不純采時時以朝政民
務相儆惕今春之翩然歸也令公跽留之不可

然竟遂陟岵之願則孝通于神明已假令如漢之舉孝弟有行義將薦登三事以亮采有邦必無難者顧以其子始貴余於是益信徵辟之典當復舉而漢治終爲近古也

贈尹令君拜刑曹序

周以六典建官彼其秩有崇庠事有繁簡地有內外而執無畸重也繇漢以後或禮樂官師或甲兵錢穀或比詳刑名要亦以隨時而輕重無常其大致則爲人主之所意嚮焉太史公記平

渾不志刑法當其時鞭撻四夷遠近騷擾財賂
衰耗天子因尊顯助邊者以風天下於是鹽鐵
有權舟車有算而言利析秋毫之臣進告緡者
賞腹誅者論而峻文決理之臣進選舉陵遲法
嚴令具猶自以爲不足也蓋事執之流相激使
然明興制倣周官參以後代然其究也固不
能不重內而輕外外而郡若理邑若令績最者
徵入備臺省法從間亦在郎曹臺省重矣頃歲
上雅意亟反之遂頓虛其大半前徵者需次久

不報故卽以最徵自諸郎止此一時也郎曹重
矣三殿兩宮大典禮費億萬計意事者將策
規山澤自然之利與關市之征以佐縣官而
上亦見用寬民力誠德意也顧廼所在抗弊以
巧詆有司沮格而坐法輦轂之下南冠而縶者
纍纍耶此一時也則諸曹又特刑重矣今年春
余邑大夫越尹公再入覲旣上績者二載還
縣之三閱月屬以郎刑曹徵尹公方怡然命駕
而邑士庶咸閔然不懌也吾大夫何以郎卽郎

何不以銓而以刑曹乎若此是未曙平時宜及深知令公者也令公治行俾悉取古之良吏若敦教化軫艱隱清版籍抑胥史興廢理劇廉平敏斷者而一一絜之靡所不合至其近而最鉅者曰礦與稅此二端者天下亦脊脊多故矣何論漢事宜城兩大璫自南弁人自北迭臨之而公不亢于跡陰有以制其命預有以伐其謀宵人之因緣爲奸者潛有以渙其羣亦不盡以窮其獄故上焉恃之如負宸下焉安之如覆盂一

時江南數十百邑實未有尹公之克衷以濟者也

今上方躬操八柄霆擊飆馳時有叵測順命則不可衡命則不能倘有尹公之克衷者乎寤之以至誠牖之以納約必當以回天聽而霽天威使三尺得與天下共而因弛山澤關市之利與天下公則刑曹又以尹公重矣士大夫貴自奉其職而有利國家耳輕重亦隨時何常哉尹公之所爲怡然命駕者意良在此雖然吾聞荀

卿之論刑凡爵列官職賞慶刑罰皆以類相從者也夫銓非主爵者乎而題之爲衡言其平也夫刑猶水也亦尚夫平而已刑平則疏密得所而天下無冤民銓平則進退有序而天下無滯材尹公聲實荐隆由比詳而調主爵終以余邑士庶盈願也旦且夕若掇之鼎小子與令公忝孔李之通家申僑札之衿契竊繆謂知令公深于其行敢以一言先駟馬尚虛簡以竢公之入銓也而所務官人者更以獻

爲唐兩生贈尹侯序

宣城尹令公用政最擢秋官郎八月旣望行有期兩唐生一澄一灝余外舅按察使吉甫先生子也謁余鼎出其詩曰此爲祖尹令公者也孤不天先嘉議蚤見背歷二十餘年而復有天幸令公祀先人于鄉惟吾子一言敘之余一再覽端襟而告之曰子失辭蓋國之大事莫如祀而政猶先尚賢昔高陽之表荀里通德之題鄭公皆以遡風猷申仰止而已至若俎豆賢人之間

揖讓素王之側廼邑士大夫動以爲祖父粉藻
有司爭以爲縉紳羔鴈遂使志節之士不以榮
而若恐浼焉令公是舉則一邑靡不躍然快翕
然稱以爲鄉先生歿而祭于社者果唐先生其
人也而唐先生實無因於尹公最後而境內之
祀典廢者建黷者正于是鬼神有常饗宰祝無
虛祈夫不規耀于耳目昭灼而潛修于菰蒿幽
眇不市恩于所可內之要地而施及于不必報
之遺孤以此論政是足覘令公之大者矣兩生

拜受命已而曰灝以童子試而令公以駒且汗血也召置門下澄卽籍郡校問疑辨難顧恒在令公函丈之內師保父母尊親具矣我兄弟更有私德焉余正色爲更端曰子再失辭夫政有重於明學術甄士類者乎子以詩見謁與子言詩彼其歌薪樞而詠菁莪者何義哉不濡首于期會簿書而殫力于章志貞教以此論政是又足覘令公之大者矣兩生拜受命然其意瑟縮似不復欲贅以詩余笑撫之曰子無庸爲吾不

敢謂子之詩工也而敢謂子之言信吾不以子之詩爲尹公重而以有子之詩知子嘗師于尹公也則子重且不聞鄭之誦子產陳留之謳爰父乎咸以能教誨子弟耳其言者抑豈必博物諛聞子姑存之兩生諾而出余退私念曰余亦瞽公以文矣第與論天下大計及比曹事而不皇及公所國士私者單父驅車于吸綸武城識人于由徑余不自知繆當令公者何居其大較可度也越晨兩生來徵文遂次第其語授之其

爲我併致令公今而後庶幾夙夜以無負公兩
生少儁以行其所學而顯其所教爲尹公稱塞
且無忘先惠也將日可見之矣

贈徐屯田權滿還南司空序

國家兩都竝建而蕪湖甌九派劍二梁爲南都
上游秋水時至不辨牛馬舟航如鳬雁梗枿杞
梓豫章鄧林之材如簪如薺江楚閩越詔驗特
柯化居者之所必趣萬貨府焉 令甲置權務
以南司空郎一人遞領之而稅眎佗務猶最鉅

然非直筭會計而已往者寧濠之釁皖圍不解卒得以扼其吭而擣其虛蕪湖則池皖之樞金陵之鎖鑰也其地重矣

今上以節儉率天下且日修九府之政權輕重而廣財賄將作大匠方大興甘泉建章之役東而有事振屬國距島酋一切徵發以億計則其時重矣是時萬曆丙申丁酉間而屯曹九瀛徐公來主權務徐公通亮廉質節安而行和惟爬搔其宿蠹而拊循其傷痍之是圖蓋權之弊凡

有三主者不躬行勾稽猾胥吏以意裁闊隘上下其手或汙至留滯不時刺閨而淹日廢事有因鬼見帝之虞又或市魁舞智將用急自翔而不使後來者居上廼主者亦有三蔽焉以譏征爲奇能鰓鰓然欲見其穎而察及淵魚析秋毫以迎合爲進趨而求溢額外以張大其勛伐至若牛車鶉衣攻苦茹澹爲人所不情之爲而特賈羔羊素絲之譽則其人巧而不慙者也徐公皆不然才精悍足自震暴而爲法簡易卽賈人

子可望而知顧左右胥吏望之而股栗不測也
參伍於時日無後期衡量於多寡無渝準有不
中程者異之無取盈有輸在公者籍之無寄徑
居一載司計者稱贏金錢數千緡五方之民之
拊掌加額驩呼祝頌者殆數萬指而徐公恥磔
刻自處優游餘暇以托興於湖山諭志於篇什
者如一日越夏將及瓜而代報績水衡轉聞

上余郡司法見義孫公適攝篆于蕪與姑孰丞
存宇鄧公理荆塗施公屬修贈于不佞孫公述

屯曹嘗忼慨私念曰泉也者謂其流行于地而彼此相灌注者也當今言利之臣日進山藪之寶藏日出而出者無以給其入入者不復出大司農少府之積貯日告匱夫豈能天雨神運邪語有之屋漏在上知之在下吾旣已知之矣固安忍竭澤爲也以故徐公孳孳務寬大不以其時重而易其地寧弛以與民耳宛陵距于湖百里而遙初第聞徐公奉職循理年始壯而老成憂國類如此公鄞人也鄞有

今上心膂股肱之臣若少保公者九瀛公之爲
南曹也徐徐于于焉安之不援輿不躡等抑大
受之君子乎雖然臣非親故何由知其賢此古
蓋臣之於其主自靖自獻維賢知賢而同巷不
相見無書達政府竟擢以不次則少保無所遜
司馬矣三公筮仕郡具卿材异日而徐公並列
朝宁協共和衷薦以任心膂股肱也尚無怠于
湖及姑孰宛陵余不佞忝徐公末胄庚無忘今
日之言

贈郡丞王公遷左相國歸東嘉序

王公前爲寧都令寧都例有徵發于隣郡歲婁
災部使者令停徵歷五六歲以至王公隣郡請
下令徵之亟王公念邑貧地僻一旦責成如重
困吾民何第以次比不能舉其數如期隣郡長
有違言無何隣郡長入計以它事鐫秩三級而
王公繇考最晉封母林安人爲太恭人且遷丞
余郡也丞非所爲郡司馬者乎王公蒐屯伏稽
軍實日夕務自奉其職嘗一攝廣德守其州俗

獷悍不畏文法王公固寬然長者乃州人益覆
用親附往被皐匿不出者咸自歸積牘爲之一
清司理闕人王公署其事會直指行部所刺舉
興革悉當則署司理以也直指蓋洛陽李公云
及今督河劉中丞並聞人也先後薦王公于
朝然故未三載滿而夏六月 衡府左長史之
命遽下矣余曹大夫士三老百姓驟聞之錯愕
不信也已咨咨慨喟之更扼腕不平交相與究
其故或謂彼隣郡無寧修其卻願得而甘心耶

或謂王公盡職官下耳曾無尺書抵輦下季弟
方爲大官丞敎使撻關卧卽鄉曲勿與通微聞
鄉曲多辯有口者間以諗王公王公嘿不應久
之驟然曰否否吾歸已吾歸已太恭人春秋高
誠不以三公易一日且以吾祖父伯仲薦從大
夫後圖史算器歲時伏臘之資不大乏絕吾入
而朝母出而課子以其餘財施閭里族黨以其
餘力陟雁宕挹龍湫叩雙闕瑯臺畢展吾濟勝
之具而極力文章以垂吾不朽之業吾習夫宦

矣宦者幻也幻莫如海當其鼓怒溢浪而激天
輪迴地軸孰推引之及其波恬暝銷而委輸大
壑孰頓抑之吾家東海上大壑在彼吾翩翩乎
歸已余曹始私計古之名賢若賈董文學若鄒
枚應劉皆爲王傳相曳長裾而托後乘其致足
樂焉庶將爲王公勸駕旣親聆其言殆灑然不
啻執熱之以濯而暍者之飲冰也又何錯愕若
嘅喟之有不佞馬之齒稍長遂屬爲序次以祖
公而諸鄉大夫士供張北郭之外酒公別然終

不無王公去後思冀相與樹七尺之碑以戒勿
翦伐此雖一郡乎亦可以覘公是矣夫主爵進
退人材爲天子持國是者也顧其公是不在
上而在下豈盛世之所宜有哉豈盛世所宜有
哉余忝備九列初亦竊預內廷之末議因論
郡國事而有概于時如此

贈南司農郎李公上績序

國家今所最亟者莫如財用而一時當官之最
難者莫如理財蓋往昔之難難在麥費而務出

今茲之難難在厚歛而務入入者不出而出者
又不勝其入東韓西播之役奮舟觸驪懸車束
馬卽多得勝算然轉輸資子幾百萬計悉取給
大司農其爲大司農在南也雖少所徵發而陪
京百司之廩六軍之饟悉出焉頃若募浙兵防
沿海亦脊脊多故已江淮吳越之交非國家

之外府乎以歲之不若且或苦礦或苦稅卒無
以舒下困而應上求以故南曹舊以司馬重今
兼以司農重是兩曹郎者皆慎選以充固時宜

也余師南樂介翁李先生初理東郡用績最擢
郎南戶曹廼所爲慎選以充者是時中牟張公
爲大司農持重知大體目攝諸曹郎而獨才李
先生一切財賦盡倚辦李先生如左右手先生
精心爲調劑其緩急而時允其出內使官有常
旣兵有常饗未幾以李先生主筦庫先生益精
心爲爬梳其伏莽而錮塞其尾間以儲有羨金
課無溢額及退而跡先生之私第則懸橐蕭然
凝塵滿席晏如也初張公之才李先生復轉而

廉李先生先生實循循先後以無事行之不欲
立慥以見才而詭削以見廉於是張公復益器
重李先生爲能大受矣會壬寅夏先生繇曹郎
滿三載考大司農書其績最者循以報 聞

天子神睿卽日坐法宮而察天下吏治若近而
指掌於財用猶唯孳孳夫財人主不必諱言也
其說具詳於周禮而總要于聖經然其論理財
則必推本用人焉故始以休休有容之臣申以
長國家務財用之戒至聚散出入所由來不亦

深切著明哉李先生北矣儻 召見而俯垂鑄
豐之慮遠勤勞止之思問所爲江淮吳越歲時
之雨暘礦稅之利弊在先生必有所入告而動
天聽者當留先生備侍從或調而司銓職用人
庶幾異日之有一个臣者乎某無似繆爲先生
所甄錄比蓋先生以東郡理典南闡試也先生
北矣因越江而偕門下二三子敬祖先生更忘
其不斐而爲序次之敕邑距陪京密邇嘗往來
聞陪京人之稱述先生者如此何敢謂二三子

智足以知先生第不至阿其所好而已

贈鮑令君覲序

某自青社籍陪京于宣城毗密多交游某君某益莫逆華乘鄴籤相與交定其于吏治民生若當世之務恒娓娓及之明年歲在庚戌元會

天子當開明堂大受計宣令侯日葵鮑公先期脂轄行蓋縣得比子男執玉帛而修 覲典禮

也某寓書余兼致其宗青衿意屬一言以志其燉某能言迺繆屬不佞要以紀治傳良史氏職

也某之言曰今寓內自畿而雄望赤緊業稱縣
皆爲 上旬宣以阜成物庶固邦本也若吾郡
隸在畿輔而爲周鄙鄆其初徵發佐軍興不啻
關中河內猶 當宁所軫重宣爲首邑令猶難
其人久之鮑侯用安義優調焉侯蜀人也髫而
卽以文名于井絡坤維之墟有蒲衣項橐之蚤
譽弱冠舉進士公車義出而誦者咸驚以爲睢
山復生矣令安義甫三月當道者又咸斂衽以
爲是齊之子奇耶子奇治阿最著年最少然猶

藉助于共載侯獨精練而鋒穎時出老吏不如
殆天所授乎豈子產學製之言所能量左氏限
年之法所可固也者宣人士承風喜駸駸見陽
宅矣惟時爲戊申夏淫雨浹旬一下車而值合
窳之祟蕩析離居公私窘迫勢殆岌岌侯挺然
叅謀郡臺捐俸轉糴乘舟賁饒言問巢廬量宜
口賦汗萊有莩仍田給種食庫鏹不繼則遴士
之有行義者布勸分之令載拜送之以激其誠
於是大家爭自發蓋藏而各有段賁俾殫殍獲

還之龍國流離復集於鴻澤者則侯是賴也侯
念以民莫厥居吾可以治治矣廼詢其因革而
循其廢舉多所措置宜好訟輒以鵬兒爲中營
以請寄爲外府侯聽斷明允無虐糺獨而畏高
明寬者解橫者服顧無骭骹而亦使人緣一目
以自解無深抵而使人棄一青以自新庚念宣
民之爲患者有四縣象于街彈間牟侵徵輸則
里魁兼并弱小則豪右飛章陷害則匿名蟠結
欺罔則胥役此禁立而四屬悉除稂莠鋟嘉禾

自茂也侯念以民喻法吾可以教矣雅志作人
月有課課有評梓其文以率厲多士今南棘得
雋者其素所擊節而首選者也侯以書起家唯
知人安民則惠寧直肆習之實允蹈之某且謂
侯燮政未暇僂數莖舉其崖略爾已郡太守金
公書來曰郡首邑令賢可卧治也余聆之瞿焉
憶昔閱宛陵志嘉靖之己酉庚戌間宣有賢令
劉應箕者亦蜀之巴人致位開府登九列侔儻
有材諝性廉介大率與鮑侯埒彼年踰壯矣而

所遭時和歲豐當其際民醇吏朴士大夫更多
自好以概于今則鮑侯其猶難能哉是行也
上從羣吏中望見侯齒茂偉儀觀計府以侯最
績上何論子奇必召試理人之策晉而崇褒德
之封卽留中正色立朝如漢之貴戚斂手以避
二鮑則侯之承先烈也豈不猗歟稱盛哉或
上仁聖終軫宣士民賜還治以竟其惠施而後
徵入則某方帥其族子弟以草薰波淥之侯迂
侯於澄江之滸矣

又

邑大夫鮑公之爲吾宣也江以南撫監之任凡
十數靡不薦鮑公治最者巡按御史關中王公
正人也則猶得公之大者云其疏之辭曰心清
若水力定如山公之贖醵賦羨無所入者有年
矣頃者版稅至九千餘金悉上府細而至一簣
一薺不及門然非所論于心也投錢飲馬縣釜
生魚非也負不任而矜以自文潤非而曲有所
援非也若將免而逆距之已示卻而反閼之非

也畏人之不知非矣而畏人知亦非也而公皆不然夫公所爲心清者內不生念外不涉境廓乎其無所卽泊乎其無所營以擬水則猶有倫焉此其于道蓋邃矣公爲政務生養而安全之多依于仁厚愷易而義激于衷間有所出之人之情有所抑必圖有所申而務守勝以吾撓或借資持構紡謀甚深以吾撼公惟以便吾政利吾民而已監察有定力之稱焉且擬之山則謂其峩然不傾巖然不震爾然公實非以自勵風

力也事至則應寧有所顧不盡耶余往數待公
則獲聞公之論士重識也古之豪雋謀王柄國
龕亂持危建大勲伐者曷嘗不原本識哉審幾
觀變洞害利之故晰是非之端蓋裕如矣以故
斷之不疑處之不懾計無遺策而動有成勲也
余不佞因是而微有所窺焉心清則神謐神謐
則靈覺起而真照融語有之須睂可鑒于止水
清流不憚于惠風則識性固清心之所自出乎
吾又未睹夫有定見而無定力者也彼其屢危

疑之地值勛之秋雖有材而倘悅周章功名
不立者豈少哉皆繇于心之淆而識之不足也
公治理茂異茲凡再 覲矣特置在周行之內
位日起任日重所論議措畫關天下大計者
天子之倚毗方切天下之責望甚殷當其時心
逐境而易流識緣感而易昧有所以岐之則一
者二三有所以引之則力分而志不定卽鼎祚
所睹記鉅公名卿其初非不卓犖瑰瑋也而幸
以勛譽終者殆難其人焉故吾願鮑公之益進

於學也公有慕乎鄉先達長卿淵雲之在蜀閬
覽麗辭將勤誦而追倣之夫此貧賤不得意發
憤之所爲若鼎祚輩是也鮑公方都廬躋華直
舉明主于三代之隆而輔久道之化抑亦從
事聖學乎歲時公修祀王文成及先大夫十先
生者于正學書院每裴回祠下者久之有仰止
之思以理義養其心以古今達其識定性以彊
力繇本以該末是聖修之塗而王佐之列也漢
以來皆隨世以就功名而建一時之勛業者尚

未敢以質公何者以其人類未聞道也鼎祚辱
公知遇最深于其別感系而稱報之無繇敬以
是爲規瑱公豁達大度諒公之能虛襟而無拂
耳矣

大中丞曹公晉右司空總理河道序

明興兩都並建南則帶江北則負河名山大海
緯絡其間凡要害阨塞以中丞臺出填靡所不
重而畿南十郡財賦居天下大半爲國家外
府淮徐以北歲漕粟四百萬灌輸京師而河爲

之吭自嘉隆以來累徙累決而河之爲患大故
中丞臺率以大司空領之事權日益峻而簡任
益務得人此固其地重乎抑其時猶重矣趙郡
曹公初治吳四郡兵以最且久從觀察使超拜
大中丞撫我畿南公甫臨鎮而礦稅之役起璫
弁縱橫執張甚民間如鼎沸魚爛幾至于肆無
歸市野無青草有虎而冠者挺自歛兢兢視也
尚方織作又歲以溢恒頽而亟徵發其務繁劇
其力助勤何有渝于此時者公特疏抗言于

上謂宜歛諸郡屬左輔實孝陵啓祥之脉宜培植不宜翦伐而時時出不意爲法其姦傳堙其倖竇織文之貢以三限之法請前後皆報聞而彼從橫者旣氣懾于公之風稜復心折于公之愷直以故公上不必犯逆鱗而下足拯累卵在公則出之有本行之無事而已比總河中丞乞代而睿慮廻翔歷數月曰吾得其人矣遂進曹公右司空領御史大夫命乘遽以往蓋上始重念畿南以公撫旣賴公保乂而豐沛之

交相繼告潰則所重在河直以河重公余惟當
漢武時以雄主之威力捐金錢沈璧馬以塞河
而瓠子之歌垂嘅千載然此虞河爾至勝國後
而虞漕矣逮于今涉淮而虞漕迫泗而虞

陵矣頃議開洫以濟漕分黃以殺河故道漸復
決口宜堰若似有成績而秋水時至單隄爲沼
望之卒不見水端何耶無亦以河無常執而功
不易集耶顧其緒足尋也公往矣如其可因則
蕭規而曹隨也如其可更則太尉之代汾陽也

公何容心焉昔禹戴鉤鈐襲玉斗拜治水土爵
司空而猶勞身焦思河精授圖始獲石匱之書
以從事後世誠而頌之曰神禹尚論者以禹之
行水唯行其所無事而已則公莅畿南固以無
事行之矣宣歙五郡以礦稅故被公澤最深鉅
余郡史侯馳書燕邸而以隣封若梁侯章侯鄧
侯鄭侯之指來俾其效一言于時羣公卿士咸
以公爲撫勞苦功高而猶勤在外恐非所以酬
庸也是不然夫投大而遺囂者聖主疇咨之

至公急病而讓夷者大臣遂志之顯義且竊闕
公之大者矣撫畿南則天心可回理淮北則
地維可紐地平天成玄圭用錫余及羣公將躬
親睹之羣公夙承公德意而分布其境內鈞一
時之良也某忝守史局職在纂述願操管其後
而紀公之勛烈焉

徽州梁侯考績上最序

畿南六郡登在三輔新都宛陵則猶踞上游控
要害三天子都有軒皇之仙蹟玄宮白嶽先朝

之帝時在焉二郡居則比鄰行則方轂凋牧所
及昏因相通親可知矣而新都多陽翟大賈淮
海鹽筴之利爲縣官外府陶白倚卓之富幾敵
國則眎宛陵倍其人巧而文喻糜髹器陶冶簞
組之工利益天下則眎宛陵倍俗剛負氣睚眦
之違輒起大獄而又善通財賄走權勢卽士亦
多怙寵而借資則眎宛陵倍其唯田賦兵戎與
卿大夫顯融之業節義勤儉之風略相等而已
余不佞以癸卯冬出守宛陵則燕山梁公甫壯

而繇三曹出爲新都者先一年所聲稱籍甚或
稱公遵周道杜私交典謁有常期庭實有常品
故三遊之徒不入境四知之餽不及門或稱公
亭兩造折片言無情則辟得情則矜故肺石虛
無人而析楊臥于壁或稱公討德禮而訓多士
敷文析理抑競獎恬故士有待舉無干澤新都
之形勝應斗杓朝六水公爲新漁梁之堰捷以
石而拓大之令圯者培瑕者固以完風氣而閭
里不知勞官帑無溢費則千百世之畫也此特

其大校云余不佞數以會同獲侍公公清標照
映朗如玉山大度汪洋曠如瀛海而且恂恂拊
身若不勝蓋有道者也嘗與余論治曰政貴簡
要爾簡可御繁以簡則定靜可君躁以靜則正
簡已靜已以用則和和生於志之定施之正也
余因知公所爲聲稱籍甚者殆有由本矣因退
而奉以周旋以庶夫寡過然而宛陵何敢望新
都迨今歲乙巳梁公績用考成諸監部累前後
薦牘以最聞凡三載而攝兵使者三之一吏

奉其職民安于田郊關晏如歲事大穰吾曹務
兢兢一郡且隳官常之是虞乃梁公兼舉而時
出窾導族解恢乎游刃有餘地而若新發於硎
此何論余無似雖列郡亦何敢望新都哉夫同
官爲僚兄弟也維茲列郡並與宗盟新都宛陵
猶爲同出始者公油油焉昇之今則儼焉而臨
之戴匡六星也繫于北斗泰符六星也尊則上
台屬令固郎官之列宿也次舍相承不愆厥度
而畿南之治理粲然明備矣比年主爵者有所

升納不時得 上命而監部就近以便宜請梁
公望鉅資深且攷成矣倘得如請卽真焉則畿
南庶司百姓之有大造也吾曹將率受功令而
宣德意何敢以寅案之私誼進